

Ordre du jour

1. 5056 - Projet de loi portant approbation du Traité international sur les ressources phytogénétiques pour l'alimentation et l'agriculture, adopté le 3 novembre 2001 par la trente et unième réunion de la Conférence de la FAO  
*(Rapport de la Commission de l'Agriculture, de la Viticulture et du Développement rural - Discussion générale - Lecture du texte du projet de loi - Vote et dispense du second vote constitutionnel)*
2. Question urgente N° 2495 de M. Ben Fayot relative à la Stratégie européenne de sécurité
3. Motion de M. François Bausch relative au Fonds d'aménagement et d'urbanisation du plateau de Kirchberg  
Motion de M. François Bausch relative aux établissements publics  
*(Discussion générale - Votes)*

Au banc du Gouvernement se trouvent: MM. Fernand Boden et Charles Goerens, Ministres.

*(Début de la séance publique à 9.03 heures)*

M. le Président.- D'Sitzung ass op.

Kolleeginnen a Kolleegen, mir kommen elo als éischte Punkt zur Diskussioun vum Projet de loi 5056, en internationaalt Ofkommen aus dem Beräich vun der Alimentatioun a vum Akerbau. D'Riedezäit ass nom Modell 1 festgeluecht. Et sinn ageschriwwen: den Här Scheuer, d'Madame Durdu, déi Häre Gibéryen, Gira an Urbany. D'Wuert huet elo de Rapporteur vum Projet de loi, den honorabelen Här Lucien Clement.

1. 5056 - Projet de loi portant approbation du Traité international sur les ressources phytogénétiques pour l'alimentation et l'agriculture, adopté le 3 novembre 2001 par la trente et unième réunion de la Conférence de la FAO

*Rapport de la Commission de l'Agriculture, de la Viticulture et du Développement rural*

M. Lucien Clement (CSV), rapporteur.- Här President, ech soen lech merci, mä ech hu gemengt, ech wär de Punkt Nummer 2 um Ordre du jour. Ech soen da merci, fir datt ech den éischte Punkt um Ordre du jour sinn.

*(Interruptions diverses)*

Elo hätt et eigentlech an der Theorie kënne sinn, datt ech hätt dären e puer Minutten ze spéit kommen an da wier alles iwwert d'Kopp gelaf.

Une voix.- Här Clement, sidd Der nach net geeschteg preparéiert?

M. Lucien Clement (CSV), rapporteur.- Dach, dach, leet Äre Kapp a Rou.

Also, Här President, Dir Dammen an Dir Hären, de Projet, mat deem mer haut befaasst sinn, behandelt d'Zoustëmmung zu engem internationalen Traité iwwer planzlesch genetesch Ressourcë fir Ernährung a Landwirtschaft, deen am Kader vun der 31. Reunioun vun der Ernährungs- a Landwirtschaftorganisatioun vun de Vereenegte Staten ugeholl gouf. D'Behalen, esou wéi déi nohalteg Notzung vu genetesch Ressourcen, gehéieren haut zu de wichtigsten Themen an de Beräicher Ernährung, Landwirtschaft, Gesondheet an Ëmwelt. Mam Opschwong vun där moderner Biotechnologie, déi d'Entwécklung vun neie Produiten opgrond vu Genen erméiglecht, ass den Zougang zu genetesch Ressourcen, sou wéi d'Verdeelung vun de Virdeeler, déi sech aus der

Notzung vun dese Ressourcë kënnen erginn, e Géigestand vu ganz villen Diskussiounen ginn.

De Projet de loi iwwert den internationalen Traité vu FAO handelt also wéi schonns erwähnt iwwer planzlech genetesch Ressourcë fir d'Ernährung an d'Landwirtschaft. FAO ass d'Organisatioun vun de Vereenten Natioune fir Ernährung a Landwirtschaft. Zënter 1983 besteet dës FAO fir eng rechtlech, net bannent Verflchtung iwwer planzlech genetesch Ressourcen.

Dës Verflchtung huet zum Zil fir d'Sammlung, d'Erhalen an d'Erfuersche vun der biologescher Villfalt vun de landwirtschaftlechen Notzplanzen ze garantéieren. Dës Villfalt ass awer duerch verschiddenen Entwécklungen a Gefor, ënner anerem där vun der industrialiséierter Landwirtschaft. D'Erhale vun dëser Villfalt ass fir d'Planzenziichtung a fir déi zukünfteg Upassung un déi landwirtschaftlesch Produktiounen, an un déi sech méi oder manner wisselnt Ëmstänn, vu grousser Wichtigkeet.

Dat zielt och fir eng standuertugepassten naturverträglech an diversifizéiert Landbewirtschaftung. D'Grundlag vun där internationaler Zesummenaarbecht war bis elo deen 1983 an der Verflchtung verankerte Prinzip vum fairen Zougang zu allen Notzplanzen, Kulturformen a planzlech genetesch Ressourcen. Dese Prinzip berout um Grondsaz, datt esou genetesch Ressourcen en Ierwe fir déi kommand Generatiounen soll sinn.

Am Laf vun der Zäit si Konflikter iwwert d'Schutzrechter vu verschidene Planzenziichtungen opkomm, sou datt den Text vun der ursprënglecher Verflchtung des Öfteren huet missen ugepasst ginn. Gläichzäiteg sinn awer och d'Rechter vun de Baueren unerkannt ginn, déi am Laf vun der landwirtschaftlecher Entwécklung déi weltwäit grouss Villfalt vun den Notzplanze geschaf hunn; si sollten dofir en Ausgleich erhalen. Et sollt en internationale Fong fir planzlech genetesch Ressourcë geschafe ginn, aus deem Projeten a Programmer zur Erhaltung an zur verbesserter Notzung vu planzlech genetesch Ressourcë finanziéiert sollte ginn.

Dese Fong ass awer, Här President, ni zum Droe komm. Mam Akraaftriede vum Kompromëss Iwwert déi biologesch Villfalt vun 1983 goufen nei rechtlech - an dës Kéier awer bannent Regelungen - zum Zougang vu genetesch Ressourcë geschafen. Dobäi gëtt vum Grondsaz vun der internationaler Souveränitéit ausgangen. Jiddfer Land verfügt iwwert déi eege genetesch Ressourcen an déi eenzel Regierungen hunn d'Recht den Zougang och gesetzlech ze regelen. Fir déi international Verflchtung vum der Ernährungs- a Landwirtschaftsorganisatioun un dese Kompromëss unzepassen an déi

vill nach ongeléiste Froen, wéi den Zougang zu de genetesch Ressourcen, wéi d'Rechter vun de Baueren, ze regelen, huet also déi 27. FAO-Konferenz 1983 beschloss, fir déi Verflchtungen nei ze verhandelen.

Den Traité iwwert dee mer de Mëtteg hei an der Chamber diskutéieren ass, no siwe laange Verhandlungsjoren, dunn endlech 2001 zustane komm an harmoniséiert mat der Konventioun vu Rio de Janeiro iwwer biologesch Diversitéit, déi am Gesetz vum 4. März 1994 approuvéiert gouf. Dësen neien Traité ass en entscheidende Schrëtt, fir déi zukünfteg Verfügbarkeet vun der Villfalt vun de planzlech genetesch Ressourcë sécher ze stellen. D'Erhale vun dese Ressourcen ass ënner anerem d'Sécherung vun der Ernährungsgrundlag vun enger bestänneg wuessender Weltbevölkerung, awer och d'Sécherung vu ville Baueren a Planzenziichter hirer Existenz.

Dësen Traité gesäit ënner anerem vir: d'Erhaltung an déi nohalteg Notzung vu planzlech genetesch Ressourcen, fir Ernährung a Landwirtschaft ze assuréieren, mä och fir d'Avantagen, déi sech aus hirer Notzung erginn, gerecht erëm ze verdeelen. Ausserdeem gëtt e multilaterale System op d'Bee gestallt, deen den Austausch vun Informatiounen an Technologien zwëschen deenen eenzelne Memberlänner virgesäit. Dës Resultater solle besonnesch den Entwécklungslänner zu Gonschte kommen.

Den Traité erkennt och déi wichteg Roll un, déi d'Baueren an der ganzer Welt am Domän vun der Erhaltung, der Verbesserung an der Verbreedung vu planzlech genetesch Ressourcë spillen. Hei sinn déi verschidden national Regierungen gefuerdert fir d'Rechter vun de Baueren ze ënnerstëtzen an och ze beschützen.

Dësen internationalen Traité iwwert déi planzlech genetesch Ressourcë fir Ernährung a Landwirtschaft gëtt als Duerchbroch zu Gonschte vun der Landwirtschaft ugesinn. D'Landwirtschaft verfügt nämlech elo iwwert en internationale rechtliche Kader op deem se hir eegen Approchen entwéckele kann.

Nieft dese positive Punkten zu Gonschte vun der Landwirtschaft muss Lëtzebuerg awer och enger Rei vu Verflchtungen nokommen. Nieft der Erhaltung, der Forschung an der nohalteger Notzung, sou wéi deem geregelten Zougang, muss Lëtzebuerg all Joer Suen an e spezielle Fong abezuelen. Duerch dese Fong ginn déi national Aktivitéiten, sou wéi déi Programmer am landwirtschaftleche Beräich fir Entwécklungslänner, déi am Kader vun deem Traité virgesi sinn, betreit a si ginn och doriwwer finanziéiert.

Här President, Dir Dammen an Dir Hären, dësen Traité wäert a Kraaft triede wann e vun op mannst 40 State ratifizéiert gouf. De leschten Informatiounen no hu bis elo eng 34 Länner dësen Traité ratifizéiert. Ech wëll an deem Kontext och drop hiweisen, datt Lëtzebuerg bis elo dat eenzegt ergo och dat éischt europäesch Land wäert sinn, wat dësen Traité ratifizéiere wäert, an dofir komme mer och an de Genoss fir eent vun deene 40 Länner ze sinn, déi dem Organe directeur ugehéiere wäerten.

Während der éischter Reunioun vun deem Gremium gëtt haaptsächlech iwwert d'Form, d'Modalitéiten an d'Ëmsetzung vum Traité diskutéiert a wéi vill Suen all Land zum Fong bäisteiere muss. Mir sinn deemno gutt placéiert, fir eis national Interesse während dëser éisch-

ter Reunioun och ervirzehiewen. Am Moment ass et nach net méiglech fir déi politesch an déi finanziell Auswierkunge fir Lëtzebuerg ofzeschätzen. De Conseil d'État huet seng Remarque och an déi Richtung formuléiert.

Des Weideren huet déi héich Kierperschaft gemengt, et wier trotzdeem interessant fir ze wëssen ob d'Radifikatioun vum Traité eng Adaptatioun vun der Lëtzebuurger Gesetzgebung géif matsechbréngen oder ob déi Europäesch Unioun déi kommunautär Léiglatioun an deem Mooss géif adaptéieren.

D'Radifizéierung vun deem internationalen Traité reit sech an déi vill Programmer an, wou Lëtzebuerg aktiv Entwécklungsaarbecht bedreift. Mir sinn dofir net fir näischt eent vu weltwäit fënneg Länner, déi d'UNO-Zil vun der Bereetstellung fir öffentlech Kooperatiounsarbecht erfüllen. D'Aide au Développement rural an d'Reconstitutioun vun de finanzielle Ressourcë vum Fonds international du développement agricole, déi dës Chamber den 21. Oktober 2003 gestëmmt huet, sinn nëmmen e puer vu ville Beispiller.

De Projet gouf den 21. November 2002 vun der Madame Ausseministeschesch déposéiert, de 27. Februar huet d'Agrarkommissioun mech als Rapporteur bestëmmt. Trotz deene puer Remarquen, déi ech elo grad erwähnt hunn, ass de Projet den 28. Januar 2003 positiv vum Statsrot aviséiert ginn. D'Agrarkommissioun vun der Chamber huet sech mat deem Projet befaasst an de Rapport vum 21. Oktober unanime ugeholl.

Dofir bleift mir, Här President, als Rapporteur zum Schluss nach just fir d'Chamber ze bidden, dese Projet an där virleiender Form ze stëmmen. Ech soen dann zugläich merci fir d'Nolauscheren a ginn och nach den Accord vun der CSV.

Ech soen lech merci.

Plusieurs voix.- Très bien.

M. le Président.- Den Här Jos Scheuer ass als éischte Riedner agedroen.

*Discussion générale*

M. Jos Scheuer (LSAP).- Här President, Dir Dammen an Dir Hären, mäi Kolleg Georges Wohlfart huet sech mat deem Projet befaasst, ass awer krank, an ech sinn dofir a senger Plaz agesprongen. Ech entschëllege mech, datt ech mech net konnt esou virbereede wéi dat hätt kënne sinn aus bestëmmten Ëmstänn, déi dat verhënnert hunn.

Dir Dammen an Dir Hären, ech bréngen den Accord vun eiser Fraktioun zu engem Projet, deen à l'unanimité gestëmmt ginn ass an eiser Kommissioun, deen awer eng ganz Rei vu Froen opwerft, Froen, déi och schonn e puermol gestallt gi sinn op dëser Tribün. D'Fro no dem Notze vun de genetesch Ressourcen. Um wëssenschaftleche Plang stelle sech do eng ganz Rei vu Froen, um wirtschaftleche Plang an och um ethesche Plang. Dat hu mer duerchdiskutéiert a concernéiert dovun ass natierlech d'Landwirtschaft, esouguer zu Lëtzebuerg an och an der Drëter Welt, mat der Problematik vun den Hongersnéit a vun der Beschafung vun Nahrungsmëttel fir eng Populatioun, déi weltwäit ëmmer méi wisst.

Dat hei ass den Ufank vun enger internationaler Regelung, de weidere Schrëtt an eng richteg Richtung. Deen internationalen Traité, deen elo no siwe Joer endlech och hei sprochräif ginn ass, deen d'Sécherung vun der Ernährungsgrundlag weltwäit sollt verbesseren, gëtt vu Lëtzebuerg natierlech ratifizéiert mat deenen Implikatiounen, déi dat fir eis huet. Mir kënne bei de Modalitéiten vun der Ëmset-

zung matschwätzen. Mir kënne bei der Form, ënnert där deen Traité elo applizéiert gëtt, matschwätzen, a virun allem musse mer och eisen Obulus bäidroen zu deemem Gremium.

Et stellt sech fir mech eng wesentlech Fro, wéi bei all dësen Traitéen, wann een esou eppes op de Wee gëtt, an et sinn zwou Groussmächten, déi net matmaachen an deem Ganzen net nëmme skeptesch, mä ofleenent géintiwwerstinn. An deem Fall sinn et mengen Informatiounen no Japan an d'USA. Da muss ee sech d'Fro stellen, wat esou en Traité weltwäit fir e Wäert huet.

Ech bréngen awer den Accord vun eiser Fraktioun.

Ech soen lech merci.

M. le Président.- Als nächst Riednerin ass d'Madame Agny Durdu agedroen. D'Madame Durdu huet d'Wuert.

Mme Agny Durdu (DP).- Här President, Dir Dammen an Dir Hären, och ech wäert mech extrem kuerz halen an den Accord vu menger Fraktioun bréngen. Ech wëll dem Rapporteur Lucien Clement merci soe fir seng Erklärungen, wou am Prinzip alles dobäi war.

Et waren haaptsächlech zwou Remarque vum Statsrot opgeworf ginn. Éischters wéi vill Länner ratifizéiert hätten. Heibäi wëllt ech complémenteaire soen zum Rapporteur, dass d'Europäesch Unioun dësen Traité guttgehalen huet, an zwar de 6. Juni 2002, a wann ech dann déi Lëschte gekuckt hunn an hoffentlech richteg interpretéiert hunn, esou hunn déi 15 Länner vun der Europäescher Unioun deen nämlechen Dag dësen Traité fir gutt befonnt a mir sinn, esouwäit wéi ech dat erfasse konnt, konkret dat éischt Land vun der EU wat dësen Traité gutt befënnt, well et eis erlaabt an deem Comité directeur, wann een dat esou dierf soen, ze sinn, dee bei der konkreter Ausaarbechtung vun dëser Konventioun wäert massgeblech bedeelegt sinn. Ech mengen, do hu mer als Lëtzebuurger Land eng gutt Roll iwwerholl.

Déi zweet Problematik, déi de Statsrot opgeworf huet bei dëser Konventioun, ass, dass et interessant wier ze wësse wat fir eng Influenz dësen Accord kënnt op eist Land hunn a wien do géif reglementéieren. Ech mengen, de Fait dass déi Europäesch Unioun als alleréischst adhéréiert huet, weist ganz kloer d'Richtlinn, déi an der Europäescher Unioun sech wäert erausschielten, nämlech déi, datt d'Europäesch Unioun och dee gréisste Poids hei wäert kréien, a wat fir een Afloss se wierklech konkret wäert kréien, wäert sech erweisen wann dës Konventioun richteg ëmgesat gëtt, an ech sinn do iwerzeegt, vu datt mer dann an deem Organe directeur sinn, dass mer do méi Afloss kënne geltend maachen, och wa mer e ganz klengt Ländche sinn.

Dëst gesot, wollt ech lech soen, datt ech den Accord vu menger Fraktioun zu dëser Konventioun bréngen.

M. le Président.- Als nächste Riedner ass den Här Robert Mehlen agedroen. Den Här Mehlen huet d'Wuert.

M. Robert Mehlen (ADR).- Här President, Dir Dammen an Dir Hären, dee Projet hei, gëtt gesot, betrëfft an éischer Linn d'Agriculture. Ech géif soen, dee Projet hei betrëfft d'ganz Mënschheet, well d'genetesche Vielfalt, déi mer do baussen hunn, ass eng Propriétéit vun der ganzer Mënschheet. Dofir ass et immens wichtig, datt deen Domän esou gutt wéi et nëmmen iergendwéi geet reglementéiert gëtt, datt all Efforte gemaach gi fir déi natierlech Diversité génétique,



déi am Laf vu Milliounen Joren entstanen ass, esou wäit wéi et iergendwéi méiglech ass ze erhalen. Mir wëssen, datt de Moment all Dag honnerte vun Aarten dobaussen, ech wëll net soen dausende vun Aarten - et ass en erschreckende Chiffer - verschwannen, an datt mat deene moderne Bewirtschaftungsmethoden, mat den Aflëss vun eiser ëmweltschiedegender Aart a Weis wéi mer schaffen, lues a lues déi Diversité génétique verluer geet.

D'Wichtigkeet dovun geet eleng doraus ervir, datt haut Wëssenschaftler, Fuerscher sech d'Suelen heiansdo duerch d'Welt oflafe fir nach originär Planzen, déi am Ufank stounge vun eisen héichgezichtenen a sou genannte vereedelte Planzen, fir erëm Genen ze fannen, wou nach Resistenzen dra verstoppt sinn, déi een erëm kënn op eis Kulturplanzen iwwerdroen a wou et heiansdo ganz schwéier ass nach déi originär Planzen ze fannen, déi déi Eegenschaften nach hunn.

Datselwecht betrëfft d'Erhaltung vun alen Déiererassen, wou de Moment och scho vill Efforte gemaach ginn, fir datt mer déi, och wa se wirtschaftlech vläicht net méi interessant sinn, erhalen fir eng Kéier kënnen op se zréckzegräifen, wa mer se da brauchen.

Dofir ass et och ganz besonnesch noutwendeg, datt d'Genbanken, déi de Moment schonn doruechter bestinn, weider ënnerehalen ginn, datt se weider vläicht nach ausgebaut ginn. Ech wëll drop hiweisen, datt virun allem an den Urwälder dat allergréisste genetesch Potenzial an nach net erfuerschte Potenzial läit, wat enorm bedroht ass, well mer wëssen, datt wann an deem Tempo virugefuer gëtt d'Urwälder ewech ze maache wéi dat elo de Fall ass, datt an zéng Joer bal nâischt méi do ass.

Eng Gefor, déi op deem ganze Sektor do läit, ass, datt natierlech ëmmer erëm Firmen alles ënnerehalen fir d'Hand op esou genetesch Ressourcen ze leeën an esouwäit wéi et geet och nach patentéieren ze loossen, fir da kënne Profit draus ze schloen.

Mir deelen déi Attitüd net. Ech hunn dat am Ufank gesot. Mir sinn der Meinung, datt d'genetesch Ressourcen, d'Vielfalt, d'Diversitéit vun de genetesch Ressourcen en Allgemenggut vun der Mënschheet muss sinn, datt keen eppes dovunner fir sech därerf kënne beasprochen, zu sengem Profit ausnotzen, anerer eventuell a seng Ofhängegkeet kann domadder bréngen. Dofir gesi mer och d'Noutwendegkeet fir dat um internationale Plang esou gutt wéi et méiglech ass, an esou effikass wéi et méiglech ass, ze regelen.

Mir hunn hei gesot kritt vum Rapporteur, deem ech och wëll gläichzäiteg merci soe fir säi Rapport, datt d'finanziell Reperkussioune fir de Lëtzeburger Stat net esou richtig ofzegesi wäeren. Mir hoffen dann, datt se sech awer iergendwéi, trotz der Wichtigkeet déi do ass, a gewëssene Grenzen hält, mä grondsätzlech wëll ech hei den Accord vun eiser Fraktioun zu deem Projet bréngen.

**M. le Président.** - Als leschten Diskussionsrieder ass den Här Camille Gira agedroen. Den Här Gira huet d'Wuert.

**M. Camille Gira (DÉI GRÉNG).** - Här President, Dir Dammen an Dir Hären, et ass schonn e bëssen eng geckeg Welt déi amgang ass vir sech ze goen am Beräich genetesch Vielfalt. Hei sinn iwwer 180 Länner déi sech Méi ginn a sech soen, mir müssen eis natierlech genetesch Vielfalt dobause schützen. Mir müssen och dofir suergen, dass de Süde ka vun där Vielfalt profitéieren. Parallell maachen e puer multinationale Firme mat der Hëllef vun de Vereenegte Staten awer alles fir genau an eng aner Richtung ze goen, well

ech mengen, et ass schonn hei e Lien tëscht der natierlecher genetesch Vielfalt an der Problematik, déi mer d'lescht Woch hei heftegst diskutéiert hunn, nämlech d'Genmanipulation, well wa mer déi dote Firmen an d'Vereenegte State gewärde loossen, dann ass et geschwënn esou, dass mer op der ganzer Welt nach just eng Maiszort, eng Räiszort an eng Sojaszort wäerten hunn. An dann ass net nëmmen déi enorm genetesch Vielfalt fort, vun där elo hei geschwat ginn ass, mä da risikéiere mer, datt net nëmme fir eis Ernährungsplanzen eng onwahrscheinlech Banalisierung kënnt, mä och doriwwer eraus an der Natur selwer. Eigentlech e weidere Grund nieft deene villen, déi hei schonn déi lescht Woch erwähnt si ginn, fir géint dës Technologie virzegoen an alles ze maachen, fir se esouwäit wéi méiglech ze verhënneren.

Ech sinn dofir frou datt de President vun der Ëmweltkommission esou prompt op d'Resolutioun vun dëser Chamber reagéiert huet a fir den nächste Mëttwoch schonn eng éischt Réunion aberuff huet, wou mer d'Käpp wäerten zesummenstrecken, fir ze kucken Léisungen ze fanne wéi mer zu Lëtzebuerg bis op Weiteres eng Koexistenz tëscht enger Landwirtschaft, déi sech op déi natierlech Vielfalt baséiert, kënne schützen vis-à-vis vu Leit, déi wëllen eng Monopolisierung an eng Ofhängegkeet vun eise Baure vun e puer Multien aféieren. Dat freet mech.

Et ass selbsterständlech, datt mir als Gréng dëse Projet de loi wäerte stëmmen. Ech deelen awer och d'Skepsis, déi de Jos Scheuer geäussert huet. Ech si gespaant, ob deen Traité hei soll duergoen, fir deen aneren Trend an der Wierklechkeet dobaussen ze bremsen, mä ech fannen et awer wichtig datt mer un der Front derbäi sinn, a wie weess ob net awer vläicht eng Kéier virun den Instanzen vun der OMC dësen Traité eng juristesch Hëllefstellung ka ginn, wa mer géint d'Virmachtstellung vun deene puer Multië wëlle virgoen.

Ech soen lech merci.

**M. le Président.** - D'Wuert huet elo den Här Landwirtschaftsminister Fernand Boden.

**M. Fernand Boden, Ministre de l'Agriculture, de la Viticulture et du Développement rural.** - Här President, Dir Dammen an Dir Hären, ech soen dem Rapporteur merci fir säi Rapport an och deene Leit, déi hei intervenéiert sinn, fir hir Ënnerstëtzung, déi se deemem Projet bréngen.

De Rapporteur Lucien Clement ass agaan op d'Roll vun der FAO an dem Kampf géint den Hunger. Ech mengen, d'FAO ass eng ganz wichteg Institution vun der UNO, wou 183 Memberstaten dra sinn. Si huet als Haaptobjektiv fir den Hunger an der Welt ze bekämpfen. Mir wëssen alleguer, datt de Moment nach esou 800 Milliounen Leit op der Welt ënnerernährt sinn. Dofir hat d'FAO schonn 1996 e Sommet mondial de l'alimentation organiséiert, wou en Engagement komm ass vun de Stats- a Regierungschefen fir bis 2015 d'Ziel vun deenen, déi ënnerernährt sinn, déi Hunger leiden, ëm 50% ze reduzéieren.

Fënnef Joer duerno, 2001, ass eng Nofolgekonferenz gemaach ginn, wou deen Objectif erneiert ginn ass. Mir wëssen alleguer, wa mer deen Objectif wëllen erreechen, da mussen mer virun allem dofir suergen, datt d'Landwirtschaft an den Entwécklungslänner verbessert, opgebaut a gestärkt gëtt, méi kompetitiv gëtt, well d'Diskrepanz an der Produktivitéit vun der Landwirtschaft enorm grouss ass. Nëmmen 2 bis 3% vun de Baueren op der Welt hunn en Traktor, héchstens 30% eppes fir hire Plou ze zéien an de Rescht muss villfach nach mat der Hand a mat ganz rudimentären Utensilien an der Land-

wirtschaft schaffen. Wesentlech ass dofir ze suergen, datt mer en Opbau vun der Landwirtschaft an den Entwécklungslänner kréien.

D'FAO dréit wesentlech dozou bäi an ech hoffen, datt deen Traité, dee jo Eestëmmegkeet fënnt hei an der Chamber, och dozou bäidrëit fir d'Landwirtschaft op der Welt ze entwéckelen, fir d'Vielfalt vun de genetesch Ressourcen besser ofzesécheren an dofir ze suergen datt mer en nohaltege Gebrauch vun de phyto-genetesch Ressourcen op der Welt kréien. Dat ass eent vun de wichtigen Elementen, och fir d'Liewensmittelsécherheet ze assuréieren.

Wéi gesot, ech si frou datt déi Erkenntnis do ass, datt mer hei solle matmaachen, och mussen matmaachen. Mir haten dat déi leschte Kéier verpasst, 1983 oder weini dat war. D'Zoustëmmung vu Lëtzebuerg zu deem Traité schéngt mer dofir ganz wichtig ze sinn, fir och e Signal ze setzen.

D'Objektiver vum Gesetz si vum Rapporteur a vu verschiddenen Intervenanten duergeluecht ginn. Ech wëll net nach eng Kéier dorop zréckkommen, wëll just zu e puer Froen eng Antwort ginn.

Éischtens ass gefrot ginn, wat d'Incidence budgétaires sinn. Dat kann een de Moment effektiv net soen, mä et ass net domat ze rechnen, datt déi esou héich ginn, datt se eise Budget géifen iergendwéi an d'Ongläichgewicht bréngen. Et ass am Artikel 18 vum Traité virgesinn, datt d'Partie contractante soll eng Strategie de financement selwer erschaffen. Am Artikel 19 gëtt en Organe directeur geschaf, dee kucken soll wéi déi eenzel Fongen zesumme komme fir kënnen d'Objektiver vum Traité ëmzesetzen. Wéi gesot, ech mengen net, datt mer do finanziell iwweruerdert gi fir matzemaachen.

Dann ass gefrot ginn, wéi vill Memberstate ratifizéiert hätten. Dir wësst, datt der mussen 40 ratifizéiert hunn, fir datt den Traité kann a Kraaft treden. Ech hunn hei vun e puer Intervenanten héieren, mir wäeren deen éischten EU-Memberstat dee ratifizéiere géif. Déi neisten Donnéeën, déi ech kritt hu vun den Affaires étrangères, déi sinn e bëssen anescht. Bis haut hätten 33 Net-EU-Memberstaten den Traité ratifizéiert. Wat elo d'Europäesch Unioun ubelaangt, esou huet d'Kommission mat de Memberstaten ofgemaach, datt si géifen en Dépot collectif maachen Enn Mäerz 2004, just virun dem Élargissement, a bis elo hätte sechs Memberstate vun der Unioun den Traité ratifizéiert: Däitschland, Spuenien, Dänemark, Irland, Finnland a Schweden, an a sechs anere Memberstate wär d'ratifikatioun praktesch um Punkt fir ofgeschloss ze ginn. Dat wieren England, Italien, Éisträich, Portugal, d'Belsch an Holland. Mir wäerte wahrscheinlech dat siwent Land si vun der Unioun dat dësen Traité ratifizéiert. Et gesäit een also, datt wann d'Unioun deen Dépot collectif mécht, dann déi 40 Staten den Traité ratifizéiert hunn an en en vigueur triede kann.

Dann ass och gefrot ginn, ob dat hei eng Inzidenz hätt op eis national Gesetzgebung. Ech hat schonn eng Kéier an der Chamberskommission gesot, datt dat net de Fall wär, well mir eng ganz Rei vu Moosnamen, zu deenen déi eenzel Memberstaten hei opgefuerdert ginn, schonn ëmgeseet hunn. Mir hunn eng ganz Panoplie vun Agrarëmweltmoosnamen ëmgeseet, déi hei präconiséiert ginn. Ënner anerem wëll ech erënneren un de Landschaftsfleegeprogramm, wou eng grouss Majoritéit, et kënnt ee bal soen d'Totalitéit vun de landwirtschaftleche Betriber matmécht.

Dann hu mer déi méi spezifesch Agrarëmweltmoosnamen, wou besonnesch eng an dës Richtung geet, d'Erhaltung vun den traditionellen Uebstbongerte mat den Héchststammuebsbeem. Dat ass en Element wou mer kënnen e Beitrag leeschte fir zur genetesch Vielfalt, wat Lëtzebuerg ubelaangt, bäizesteieren. Dann hu mer och e Reglement gemaach iwwert d'Sauvegarde vun der Biodiversitéit, wou mer d'Baueren encouragéiere fir d'Biodiversitéit ofzesécheren. Och do ass e Programm d'aide virgesinn, sou datt déi Moosnamen, déi zu Lëtzebuerg getraff gi sinn, schonn an déi Richtung ginn, an net domat ze rechnen ass, souguer wann een dat renforcéiere géif, datt ee misst d'Gesetzgebung ofänneren. Wat wahrscheinlech muss geschéien ass, datt eng Rei vu communautären Direktive ëmgeännert ginn, besonnesch wat d'Commercialisation vun Saatgut ubelaangt. Wann déi Direktive geännert ginn, da mussen mer natierlech eis Gesetzgebung deemno upassen.

Wat elo aner Programmer ubelaangt, mengen ech, datt et zu Lëtzebuerg méi sënnavoll wär a méi nützlich, fir eis ze bedeelegen un dem Finanzement vun enger Rei vu Projekten op internationalem Plang a besonnesch an den Entwécklungslänner. Déi Zones géographiques, déi Centres de diversité végétale genannt ginn, déi si meeschtens an Entwécklungslänner a stinn heiansdo a Gefor fir érodeiert ze ginn, an esou déi genetesch Vielfalt do verluer geet. Dofir, mengen ech, wär et net onlogesch, datt mer versichen duerch e Beitrag iwwert d'Entwécklungshëllef och do Projekten ze ënnerstëtzen. Ech sinn iwwerzeegt, datt dat vläicht e klengen Impakt huet op de Budget vun der Entwécklungshëllef. Ech mengen awer net, datt dat grouss finanziell Konsequenz géif matsechbréngen.

Wat d'Problematik vun den OGMen ubelaangt, déi den Här Gira ugeschnidden huet, wësst Der, datt Lëtzebuerg ëmmer do eng ganz streng Haltung ageholl huet. Mir sinn déi, déi mat derfir plädéieren an der Europäescher Unioun, fir datt d'Koexistenz soll europäesch ofgeséichert ginn, net datt all Memberstat misst eege Reglementationen do maachen. Ech géif mer wënschen, datt vill méi Memberstaten dat géifen ënnerstëtzen, zum Beispill déi, wou déi Gréng mat an der Regierung sinn. Dat ass ee Message, deen ech dem Här Gira wëll matginn, fir vläicht bei hire Kollegen, europawäit sinn déi Gréng jo net sou schlecht organiséiert, mat ze intervenéieren, dass se do och matmaachen a mathëllefen, fir dass déi Koexistenz, déi fir mech ganz wichtig ass, dass déi kann, net national, mä europäesch geregelt ginn.

Mir wäerten am nächsten Agrarconseil eng Diskussioun hunn iwwert d'Biolandwirtschaft, wou Konkursiounen vum Conseil festgehale ginn a wou Lëtzebuerg an Éisträich op jidde Fall wäerten eng schréfflech Déclaration déposéieren, dass mir der Meinung sinn, dass dee Problem vun der Koexistenz wichtig ass fir d'Biolandwirtschaft an dass mer hoffen, dass eng europäesch Léisung do kënnt. An, wéi gesot, ech hoffen dass mer do och d'Ënnerstëtzung vu méiglechst ville Memberstate kréien. Pour le reste nach eng Kéier merci fir déi grouss Ënnerstëtzung, déi dëse Projet kritt huet, an ech hoffen dass en och eestëmmeg hei gestëmmt gëtt.

Merci.

**Plusieurs voix.** Très bien.

**M. le Président.** - D'Diskussion ass elo ofgeschloss. Mir kommen zur Lecture vum Article unique vum Projet de loi 5056 a stëmmen driwwer of.

**Lecture du texte du projet de loi (par M. Jean Spautz)**

Den Article unique ass gelies an ugeholl.

Mir kommen zum Vote iwwert dee virleende Gesetzesprojet.

**Vote sur l'ensemble du projet de loi et dispense du second vote constitutionnel**

Déi déi fir de Projet si stëmme mat Jo, déi aner mat Neen oder si enthalen sech.

De Projet de loi 5056 ass unanime mat 54 Jo-Stëmmen ugeholl.

*Ont voté oui: Mme Nancy Arendt, M. Lucien Clement, Mme Marie-Josée Frank, MM. Marcel Glesener (par M. Laurent Mosar), Jean-Marie Halsdorf, Norbert Hauptert, Nico Loes, Paul-Henri Meyers, Laurent Mosar, Mme Ferny Nicklaus-Faber, MM. Patrick Santer, Marcel Sauber (par Mme Nancy Arendt), Marco Schank, Jean Spautz, Mme Nelly Stein (par M. Jean-Marie Halsdorf), MM. Théo Stendebach, Nicolas Strotz, Fred Sunnen, Lucien Weiler et Claude Wiseler;*

*Mme Simone Beissel, MM. Jeannot Belling, Xavier Bettel (par M. Claude Meisch), Niki Bettendorf, Emile Calmes, Mme Agny Durdu, MM. Gusty Graas, Claude Meisch, Mme Maggy Nagel (par Mme Agny Durdu), MM. Jean-Paul Rippinger et John Schummer;*

*MM. Jean Asselborn, Alex Bodry (par M. Jean Asselborn), Mme Mady Delvaux-Stehres (par M. Ben Fayot), M. Mars Di Bartolomeo, Mme Lydie Err (par M. Mars Di Bartolomeo), MM. Ben Fayot, Jean-Pierre Klein, Lucien Lux, Mme Lydia Mutsch (par M. Marc Zanussi), MM. Jos Scheuer et Marc Zanussi;*

*MM. Jean Colombero, Gast Gibéryen, Fernand Greisen (par M. Gast Gibéryen), Jacques-Yves Henckes (par M. Jean-Pierre Koepp), Aly Jaerling, Jean-Pierre Koepp et Robert Mehlen;*

*MM. François Bausch, Camille Gira, Jean Huss, Mmes Dagmar Reuter-Angelsberg et Renée Wagener (par M. Camille Gira).*

Gëtt d'Chamber d'Dispens vum zweete Vote constitutionnel?

**(Assentiment)**

Et ass also esou decidéiert.

An da komme mer elo zu enger Dringlechkeetsfro, déi de Kolleeg Ben Fayot gestallt huet, iwwert d'Strategie européenne de sécurité. D'Regierung huet sech bereet erkläert, direkt op déi Fro ze äntwerten, an ech ginn d'Wuert elo un den Här Ben Fayot.

## 2. Question urgente N° 2495 de M. Ben Fayot relative à la Stratégie européenne de sécurité

**M. Ben Fayot (LSAP).** - Här President, muer an iwwermuer hält den europäesche Rot zu Bréssel en Text iwwer eng europäesch Strategie vu Verdeedegung un. An der Verfassung selwer, déi och vun der Regierungskonferenz dëse Weekend soll approvüiert ginn, si weider Formulationen iwwert d'Verdeedegung enthalten.

Bis elo ass an deem Parlament wéineg, wann iwwerhaupt, iwwert déi Problematik geschwat ginn an ech mengen d'Verdeedegungsolitik ass trotzdem een ureegent Gebitt vu parlamentarescher Kontroll. A mir wëssen och, dass wa vu Verdeedegung geschwat gëtt, dass dann och ëmmer vu Capacitéite geschwat gëtt, dat heescht vu Modernisierung, vun Investissementen, also neien Ausgaben.

Mir hunn dat erlieft, wéi d'Regierung en Airbus matbestallt huet, ouni dass d'Chamber weider doriwwer gefrot gouf. An et sollt och e Stéck Schëff kaf ginn, wat awer elo net méi aktuell ass, well dat ze deier gëtt.

Et ass virauszegesinn, dass finanziell Efforte gemaach mussen ginn an et wär gutt wa mer mat Zäit, dat